

## АСТАНА – БЕЙБІТШІЛІК БЕСІГІ

Қазақ халқы қай заманда да астанасының, ордасының қоныс тепкен жеріне орасан зор мән берген. «Орда» сөзі «орта» деген көне түрік сөзінен шыққан.

Қазақ елі кеңестік кезеңде астанасын екі рет көшірді. Алғашқы таңдау 1925 жылы Ақмешітке түсті. Дегенмен билікке қаланың байырғы атауы ұнамай, ол Қызылорда деп өзгертілді. 1927 жылдан бастап Қазақстанның астанасы Алматы қаласы болды.

Екі мыңжылдық тоғысар тұста қазақ елінің астанасы Республика ортасына – Ақмолаға көшірілді. Қиын кезеңде астананы өзгерту себептері туралы Елбасы «Еуразия жүрегінде» атты кітабында былай деп жазады: «Астананың арқасында біз елдің иесі, жердің киесі кім екенін таныта алдық. Өз ұлтымызды одан сайын ұйыстыра түстік, өзге ұлттар мен ұлыстарды ортақ мүддеге жұмған жұдырықтай жұмылдыра білдік».

Ел ордасына айналып, жаңа кейіпке ене бастаған Ақмоланың затымен қоса аты да өзгеріп, Қазақстан Республикасы Президентінің 1998 жылғы 6 мамырдағы Жарлығымен Астана деп аталды.

Астана сөзі – парсы тілінде табалдырық деген мағынаны береді. Табалдырық – түркі дүниесі тәу етіп, қастерлейтін, киелі санайтын орын. Қазақ халқының салты бойынша табалдырықта тұрмайды, табалдырықтан оң аяқпен аттайды.

Осман түріктері әулиелі жерді, руханият ордасын астана деп атайды екен. Біздің Астана – осы екі мағынаны да қамтып отырған қала. Бүгінде ол – мемлекетіміздегі тарихи шешімдер қабылданатын саяси орталық қана емес, рухани орта, мәдениет ордасы. Тарих үшін қас-қағым сәт болатын 20 жылдың ішінде ол әділетті, парасатты, бейбітсүйгіш істерімен әлем назарын өзіне аудара алды.

Ол – әлемдік және дәстүрлі дін өкілдерінің басын қосқан, бірнеше жыл бойы бітімге келмей жүрген мемлекеттер басшыларын бір шаңырақ астына жинаған, өркениеттер қақтығысына мәдениеттер келісімі арқылы жауап берген құтты қала. Бүгінде Астана халықаралық мәселелерді талқылау мен шешуде Рим, Париж, Лондон сияқты қалалармен қатар аталатын қалаға айналды.

Ең бастысы, Астана – бүкіл әлемге қуғынға ұшырап, бас сауғалап келген сан ұлт өкілдеріне қамқорлық танытудың үлгісін көрсетіп отырған елдің ордасы.

Астана төрінен достық пен бейбітшіліктің, ынтымақ пен бірліктің символындай Бейбітшілік пен келісім сарайы бой көтерді. Биыл, Астананың 20 жылдық тойына орай, қалалық Достық үйі пайдалануға берілді. Бұл ғимарат – барша этностардың туған тілдері мен мәдениеттерін дамытуға жасап отырған мемлекеттің қамқорлығының бір ғана көрсеткіші.